


## He Whakatau

Me mātua pānui kia mārama rawa koe i ngā whārangi 8–14 o tēnei pukapuka.



## He whakarāpopoto

Pānuihia te whakarāpopoto ki te ākonga.

Tihei mauri ora! He aha ngā āhuetanga hei whakarite mā te whānau e rerī ai rātou mō te whānautanga mai o tō rātou pōtiki?

## He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

He aha te tikanga o te kupu “Tihei mauri ora”? Whiriwhirihia ia wāhanga o te hapūtanga o Māmā. He mea tino nui hoki te tautoko i te wahine hapū. He aha ai? Whakarārangihia ngā rerenga kōrero, me ngā kupu tautoko kia kitea ai tēnei tino ariā.

## He Matapaki

### Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei;
  - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
  - te pātai mō tētahi āhuetanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
  - te whakatenatena i te ākonga mō tana tiro ki mua i whakapuata ai ia i te wā o te whakataki.

### Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

## He whakapuaki māramatanga

1. He aha i pai ai ki te kaikōrero te mirimiri i te tuarā o Māmā?
2. He aha ngā kai pai i hokona e rātou mā Māmā?
3. I te taenga mai o pēpi, ko tēhea wāhanga o tana tinana i puta tuatahi, tuarua, tuatoru mai?
4. Whakamāramahia mai te tikanga o ēnei kupu, “Kua puta mai ki te whaiao, ki te ao mārama”, i roto i tēnei paki.
5. He aha atu anō ētahi kōrero whakawhānau pēpi kua rongo koe?

## Ngā whakautu ki ngā whakapuaki māramatanga

1. Kia tata ai ia ki a Māmā.
2. He hua whenua, he hua rākau, me ngā kai pērā i te miraka, te parāoa, te heihei.
3. Ko tōna upoko te tuatahi, ko ōna pakihwi te tuarua, kātahi ko tōna tinana.
4. He maha ngā whakautu rerekē.
5. He maha ngā whakautu rerekē.

## He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuetanga o te pukapuka nei.

## Te pūtake

**T** He āta titiro, he tautuhi i ngā ariā matua mai te pukapuka.

### He whakatakinga ā-roro, he whakaharatau

I mua i te pānui me matapaki tahi kōrua ki te tapanga o te pukapuka, arā, he aha te tikanga o te “Tihei mauri ora?” Kua rongo anō te ākonga i tēnei rerenga kōrero. E whakaatu ana tēnei rerenga kōrero i te aha?

Kia taunga te pānui a te ākonga ka whakahoki anō ai ki te tiro mēnā i hāngai āna whakamārama. Me matapaki hoki te tikanga ake o te whakatau i te tangata i tōna putanga tuatahi mai.

“Tihei mauri ora! Kua puta mai ki te whaiao, ki te ao mārama.” Me matapaki tētahi tikanga kua kite te ākonga e whakamahia ana ki te whakatau i te pēpi hou.

Tērā, ko te waiata, ko te oriori rānei. He aha ētahi momo oriori? Me whakaharatau te ākonga ki te tuhi tētahi whiti oriori. Kia mutu ka whakaatu ai ki te akomanga.